

» Penyair Sabah, Semenanjung berpadu jayakan Malam Puisi Riong

Oleh Nazmi Yaakub nazmi@bh.com.my

# Semangat patriotik kuasai UMS



Pelajar Universiti Malaysia Sabah (UMS) menyampaikan lagu Kemerdekaan pada Malam Puisi Riong sempena 50 tahun Sabah Maju dalam Malaysia.

[FOTO ZUNNUR AL SHAFIQ/BH]

Semangat puisi patriotik berkobar-kobar dan disertai kibaran Jalur Gemilang oleh kira-kira 2,000 khalayak bergema memenuhi setiap ruang Dewan Canselor, Universiti Malaysia Sabah (UMS), Kota Kinabalu, pada Malam Puisi Riong BH-UMS, baru-baru ini.

Malam Puisi Riong sempena Sambutan 50 Tahun Sabah Maju Jaya Dalam Malaysia juga gemuruh dengan sorakan penonton yang diselang-seli ketawa mereka, sekali gus menjadikan acara puisi anjuran BH dan UMS itu hangat dengan deklamasi puisi, alunan syair dan nyanyian lagu puisi.

Naib Canselor UMS, Prof Datuk Dr Mohd Harun Abdullah, mendeklamasikan karyanya, *Sajak Untuk Kita*, dalam nada syahdu hingga menenangkan gelombang rasa khalayak, sekali gus membawakan semangat itu kepada kesedaran yang padu.

*Kita hidup di bumi nan satu namun di dunia dan alam nan berbeza hari kian hari terus leka mengejar hidup yang fana dan sementara tidak ramai yang sedar, kita alpa dalam mengenal diri dari mana kita datang dan hala tuju ke mana, pergi untuk apa kita datang ke dunia ini dan kita ini tidak memiliki.*

Pengarang Kumpulan BH, Datuk Mior Kamarul Shahid pula membacakan puisi, *Kita, Warga Bumi Merdeka*, sekali gus memberikan makna istimewa kepada karya Yang Di Pertua Badan Bahasa dan Sastera Sabah (BAHASA), Jasni Matlani.

Ia seolah-olah memberi maksud suara dari Sabah disampaikan oleh tokoh media dari ibu kota yang

melambangkan kesatuan dalam merayakan kemerdekaan, penguatnuhan Malaysia dan kemajuannya.

*Mari! Mari kita nyanyikan lagu permai sambil berganding tangan dan padamkan api perbalahan Mari! Mari kita tanggalkan debu peradaban Di persimpangan malam dan cipta sebuah citra Mari kita kibarkan Jalur Gemilang dan sirami bumi merdeka, dengan haruman seribu mawar Mari! Mari kita bina sebuah tamadun semarakkan bumi merdeka, dengan gegaran sebuah sumpah.*

Suara itu disambut Pembantu Menteri di Jabatan Ketua Menteri Sabah, Datuk Ariffin Arif dengan puisinya, *Malaysiaku Berdaulat, Tanah Tumpahnya Darahku*.

Dengan perlambangan alam, Ariffin mengungkapkan seruan

pengorbanan yang tinggi dan kecin-taan yang murni terhadap tanah air sehingga tidak sanggup menabur lumpur pada bumi yang subur.

*Ini persada berdaulat perlu subur dengan tanah liat adab dan adat mari kita kubur sedalam-dalamnya haloba dan khianat damailah tanah berdaulat ini.*

Deklamator yang mencipta nama dalam Sayembara Deklamasi Puisi Hari Kebangsaan yang juga jurugambar The New Straits Times Press (M) Berhad (NSTP), Datu Ruslan Sulai, pula mempersembahkan puisi *Wasiat karya Aliudin Mohd Salleh*.

*Generasiku jika ada nanti yang bertanya katakan wasiat bangsa dimateri dengan penuh maruah dan berdaulat dari perjuangan yang kental dari pengorbanan yang tinggi sifatnya*

*bangsa yang bermaruah dan berdaulat bangsa yang lahir dengan semangat juang yang kental bangsa yang tidak kenal berputus asa.*


Wasiat itu bagaikan disambut oleh Ketua Jabatan Canselori UMS, No'man Ahmad, apabila mendeklamasikan puisi, *Cinta Waja Warga Merdeka*, merakamkan keutuhan azam untuk mempertahankan kemerdekaan tanah air yang berdaulat.

*Kami tafsir segala peradaban menyirami kuntum perkasih telah kami baca keakraban pengalaman material luka silam masih mengimbau menggamit sejuta pesona waspada akan kami tangkis durjana, mengikis sengsara di sini kamilah anak merdeka melangkah maju tak gementar membentuk wawasan tanpa gagal.*

Syair *Di Bawah Bayu* oleh penulis dan dramatis, Noor Aisah Maidin, pula menjadi halwa telinga pada majlis yang turut dimeriahkan dengan lagu puisi oleh ahli kumpulan Koprata, Sani Sudin; penyanyi lagu puisi Sabah, Awang Karim Kadir; Naib Juara *Akademi Fantasia (AF) 3*, Felix Agus dan Presiden Majlis Perwakilan Pelajar (MPP), Mohd Juhar Harun serta persembahan kumpulan Gambus Brunei.

*Di Bawah Bayu* gelar diberi negeri Sabah nama terpatari warganya hidup menjulang pertiwi pelbagai kaum menjalin tradisi.

Malam Puisi Riong BH-UMS itu turut dimeriahkan dengan dekla-



Mior Kamarul Shahid



Datu Ruslan



Ariffin Arif



Harun Abdullah

masi puisi Penerima Anugerah Penulisan Asia Tenggara (SEA Write) 2005, Abdul Ghafar Ibrahim (AGI); penyair dan dramatis, Khalid Salleh; penulis muda, Ampuan Awang dan pelajar UMS, Fandyi Sanizan.

Selain orang seni dan sastera, malam puisi itu turut menampilkan Timbalan Naib Canselor Hal Ehwal Pelajar dan Alumni UMS, Prof Madya Datuk Dr Kassim Md Mansur dan Presiden Dewan Perniagaan Melayu Sabah, Datuk Awang Buhtaman Awang Mahmum.

Malam puisi itu dikendalikan oleh Pensyarah Fakulti Pengajian Seni, UMS, Mohammad Fuad Bebit yang turut membacakan puisi jenaka sebagai selingan antara deklamasi puisi dan lagu puisi, sekali gus menjadikan khalayak terpaku di kerusi sehingga tamat majlis.



Ampuan Awang